

Cussegl federal sa defenda cunter critica areguard custs per il FEM

Resposta sin l'interpellaziun da Silva Semadeni

■ (anr/vi) **Silva Semadeni vulesch ch'il FEM contribueschia dapli vi dals custs da segirezza durant l'inscunter annual a Tavau. La finala haja el gea reservas da passa 200 milliuns francs, scriva la cussegliera naziunala en in'interpellaziun. Il cussegl federal è d'in auter avis.** L'inscunter dal FEM a Tavau porchia a la Svizra ina plattafurma per preschentar ses interess, scriva il cussegl federal mez favrer en sia resposta sin l'interpellaziun. La spessa preschientscha da schefs da stadis pussibileschia al cussegl federal da manar discurs substanzials che na fissan en autra guisa betg pussaivels.

Ilscunter annuals chaschunian duas sorts custs: Dad ina vart ils custs per l'assistenza da l'armada che summian sin 32 milliuns francs. Quels sajan cuvrids entras il budget ordinari da l'armada. Da l'autra vart sa resultian custs da segirezza da nov milliuns francs. Lezs portian la confederaziun (trais otgavels), il FEM ed il chantun (mintgamai dus otgavels) e Tavau (in otgavel).

Co interpretar las reservas?

Semadeni crititgescha questa clav da repartiziun perquai ch'il FEM cun sias reservas pudessia manavei surpigliar ina pli gronda cumpart. Il cussegl federal in-



Silva Semadeni.

MAD

terpretescha las reservas dal FEM dentant sco chapital da ristg en cas che l'inscunter annual stuess ina giada vegnir ditg giu sur ura. Plinavant planiseschia il FEM in engrondiment dal quartier general a Genevra nua ch'ins veglia stgaffir passa 200 ulteriuras plazzas da lavur.

Il cussegl federal defenda la clav da repartiziun perquai che tuts profiteschian. La clav valia fin il 2021, stat scrit en la risposta, e lura evalueschian ins danova-

main la situaziun. Il pensum da proteger schefs da stadis e diplomats restia dentant en mintga cas chausa da la confederaziun. La cussegliera naziunala aveva fatg sia interpellaziun perquai ch'ils custs da segirezza eran creschids dapi il 2015 dad otg milliuns sin passa nov milliuns francs. Plinavant ha Semadeni fatg attent sin custs supplementars. Lezs na vegnan betg repartids tenor la clav, mabain pajads da la confederaziun.